



四川名勝志卷之七

閩中曹學佺能始著

成都府七

崇慶州

在府城南一百一十里

領縣一

古蜀州也三國志云益州之地仰給于蜀是矣宋大觀三年高宗封蜀國公南渡紹興中乃陞為崇慶府元降為州 國朝因之○漢曰江原以江水所由也有江源祠莽曰邛原以與臨邛近也濱文井江晉曰晉原以有晉原山也即鶴鳴山唐曰唐安以保安唐室也在西巡時今唐安為驛而江原

為鎮矣○唐王勃送杜少府之任蜀州城闕輔三
秦風烟望五津與君離別意同是宦遊人海內存
知己天涯若比隣無為在岐路兒女共沾巾丹銘
錄云江水自湔堰至犍為有五津曰白華津萬里
津江首津涉頭津江南津此華陽國志所載盧照
隣文有曰予自江陽言歸五津亦指此也宋之問
送趙少府之蜀州餞于西南望煙綿劍道微橋寒
金雁落林曙碧雞飛職拜輿方遠仙成履會歸定
知和氏璧遙掩玉輪輝○碑曰云天章雲篆碑在
蜀州唐開元壽王清書又云蜀州刺史廳壁記大

曆年間作以張柬之鍾紹京李峴王縉四公皆牧
是州故有四相堂唐詩紀事貞元十四年皇甫澈
刺蜀州時賦四相詩序云居相位者前後四公謨
明弼諧遷轉歷比顧已無取忝跡于斯景行遺烈
嗟歎不足謹述其行事詠其休美庶將來君子知
聖朝之德云爾○州治判官解後池即罨畫池趙
抃有蜀倅楊瑜邀遊罨畫池詩占勝芳菲地標名
罨畫池水光菱在鑑岸色錦舒帷風碎花千動烟
團柳四垂巧才吟不盡精筆寫徒為照影搖歌榭
分香上酒卮主人邀客賞和氣向春期○文潞公

祠在判官廳蓋公之父在天禧時來作判官令公受業于晉原大夫張錫之客任君後爲立祠○西湖在郡圃蓋皂江之水皆導城中環守之居因瀦其餘以爲湖范成大吳船錄云蜀州郡圃內西湖極廣袤荷花正盛覓湖船泛之繫纜修竹古木間景物甚野游宴繁盛爲西州勝處陸游劍南詩藁云蜀人謂唐安有三千官柳四十琵琶故詩云歸心日夜逆江流官柳三千憶蜀州○范蜀公鎮留題在城內之太平院公遊岷山過此題紀院之經閣上云熙寧八年三月遊青城間四日趨峨眉俱

過此與百世相見百朋百嘉侍行蜀郡公記○州西南附郭龍門街是晉原縣治寰宇記云白馬江自晉原縣入新津縣界卽杜甫詩白馬江寒樹影稀者○碑目云蜀先生碑在晉原縣西南二里唐房瑄文唐開元碑天寶八年立在晉原常清觀鮮于仲通文○周地圖記云晉原西五十六里墓頤山上有鹿市百步平坦諸山之鹿日一聚于此○寰宇記云鶴鳴山在晉原縣西八十里絕壁千尋李膺益州記張道陵登仙之所嘗有白鶴遊其上此與邛州交界按臨邛故城俗名公孫述城益州

記云蓋李雄據蜀李壽從牂柯引獠入蜀境自象
山以北盡爲獠居臨邛舊縣因茲置也晉原向屬
州附郭我 明乃省入州○志云蜀州有東亭杜
甫和裴迪登蜀州東亭送客逢早梅相憶見寄詩
東閣官梅動詩興還如何遜在揚州此時對雪逢
相憶送客逢春可自由幸不折來傷歲暮若爲看
去亂鄉愁江邊一樹垂垂發朝夕催人自白頭○
州東三十里江原鎮卽漢江原縣治華陽國志江
原縣郡西渡大江濱汶井江水經云汶井江亦李
冰所導井上有守捉三十里上有天馬祠李膺益
州記寧州有馬元河河邊牧馬產駿駒一日千里
至此斃乏岸南人爲立祠于此水經註小亭山有
天馬塚是也○寰宇記云鄴江出麩金一名皂里
水自未康軍青城縣百丈水南流入江源界志云
皂江逕江原至新津入河昔張道陵投墨于江其
水盡黑故名皂江有北橋杜甫詩云望極春城上
開筵近鳥巢白花簷外朶青柳檻前梢池水觀爲
政厨煙覺遠庖西川供望眼惟有此江郊○勝覽
云杜工部祠在江原縣邑宰趙抃建昔杜甫依高
適寓于此○寰宇記云公孫述女冢在江原縣東

一十三里高三丈周廻二十步故老傳云此冢銅作絞絡五里故亂離發掘莫之陷也○碑目云唐李百藥碑在江原縣之萬歲寺唐樊知遷碑在江原縣淨居寺顏師古文○唐太平公主出家勅在天慶觀按魏了翁江原縣天慶觀雲層臺記略云開禧三年春蜀盜未平江原道士呂元素語其徒曰吾儕小人羣居族食無益縣官今逆氛若此又不能割亦賊腹膏首原野盍姑杜門以需底定乃相與校藏書見其書有爲九層之臺可以爲民禳疹祝釐者則用其法而封之名以雲臺列天地日

月星辰岳瀆之象而禱祠焉○宋皇祐間趙閱道爲江原令其二弟揚抗與俱有引流聯句序云江源縣江繚治解址而東距二百步瀧湍馳激朝暮鳴在耳使人聽愛弗倦遂甬渠通民田來圍亭堦廡間環廻遶旋溝行沼渟起居觀遊清快心目公暇事休與弟抗揚坐東軒樂然盤桓共爲詩章云別派從江垠邀流入農畝淙淙來源深灑灑度溝淺疏功浹旬流漑利千步遠田觀疑澤瀦坎聽類甌建北溟類鑿池幽岳漾裝巘流行拂落葉浸長浮生蘚孤鶴眼恠窺纖魚鬣跳展映葦色莫分喧

琴韻難辨增霖晨鬧蛙涵月夜驚犬憐黃澆菊籬
惜紫沃蘭畹吏治密壁毳毳童戲芒車卷灌攜合手
勞漱掬致腰俛庭秋臨加涼軒夏向消烜我矜近
濟能僅賀遙沒免貯庀理巨甌歸厨架修篔供淘
飯益糧給澳羨鼎鬻調藥修舊餌剪茶試新筵坐
客頻泛觴蹲兒屢洗硯聆寒心脫煩挹冷酒除面
閒眺筇步隨靜看髭吟撚高懷造文攄清興團詩
遣題爲引流篇記耳非自銜

新津縣

在州東南
二十里

周地圖記云閔帝元年立新津縣本李膺益州記

皂里江津之所曰江津市也○唐天寶之後裴廸
依王縉于蜀州與杜子美友善寓新津昭覺寺有
倡和見本集○張商英以古三墳書得于縣北陽
民家墳皆古文傳乃隸書英字天覺新津人○范
成大新津道中雨後郊原淨村村各好音宿雲浮
竹色清溜走椳陰曲沼擎青蓋新畦藝綠針江天
空闊處不受暑光侵在以萬曆庚戌過此詩云結
束爲津口分明作秀顏雪峰俱映水天社舊名山
客自荆吳外民其印蜀間昔賢有佳句磊落動人
寰壬子歲再過此詩云風日何淒緊予行在仲冬

平林煙已盡近郭渡猶重古市沙中火僧樓水際鐘東西雖不辨彷彿認前峰蓋指修覺山也○志云縣南一里修覺山神秀禪師結廬于此唐明皇駐蹕爲題修覺山三字寺有左右二井春夏汲東秋冬汲西水斯甘冽反之則否名曰林泉殆靈泉云其下爲三江渡因岷江皂水白馬三江並列而名其上爲寶華山橫跨江表俯瞰平川取物華天寶之義峰頂多雪又名雪峰杜甫新津寺寄王侍郎詩何限倚山木吟詩秋葉黃蟬聲集古寺鳥影度寒塘風物悲遊子登臨憶侍郎老夫貪佛日隨

意宿僧房按王侍郎卽相國縉也時爲蜀州長史○李白送友人詩青山橫北郭白水遶東城此地一爲別孤蓬萬里征浮雲游子意落日故人情揮手自茲去蕭蕭班馬鳴詩林振秀題下加新津作三字○縣南二里有四安寺亦秀公剏杜甫暮登四安寺鐘樓寄裴十暮倚高樓對雪峰僧來不語自鳴鐘孤城返照紅將斂近市浮煙翠且重多病獨愁常聞寂故人相見未從容知君苦思緣詩瘦太向交遊萬事情此卽裴秀才廸也○碑目云唐開元皇帝送趙仙甫尊師歸蜀詩碑見在新津縣

寶真觀○縣南二里平岡治下第八治也上應參
宿蜀人李阿瞿君于此學道有杜天師詩刻石○
勝覽云投龍觀在新津縣南六里枕夜郎溪及白
木水上有龍穴祈禱皆應○又二里爲稠稷山味
江水遶其麓有草名稠稷服之長生不死上有丹
竈古碑宮闕天池軒轅帝于此得仙第四稠稷治
也上應危宿○又十里有本竹治高千三百丈上
有白水松香林叢竹郭子聲得道之所北有龍穴
地道通峨眉山西通鶴鳴山治前水中常有神龍
遊戲號曰龍門○皂江在縣城外自蜀州江原縣

來後唐張立新津人長于詩什隱居山谷著有皂
江漁翁集數十篇宋唐英商英皆其裔也○竟陵
鍾惺遊修覺山記云辛亥十月十有九日早發新
津叔弟恬不知隔江者爲何許山也與童騎疾驅
過之予與艾子後坐舟中指江干削壁千仞竹樹
榱桷出沒晴嵐雪浪外者異焉問之則修覺山子
美游修覺寺詩明皇幸蜀大書修覺山三大字嵌
石壁今猶存者卽其處也決策登焉所從徑裒山
石之複者爲磴亂整枉直各肖其理登者屢憩憩
處每平平處每當竹樹隙隙處必從其下左方見

江江錯積渚或圓或平或逝或返去留心日間土人縛竹爲亂若童子置葉盎中以度蟻從上視下輕且駛甚適也度磴去頂可四五之一行往坐立更端者數矣其傍乃有石級齒齒蜿蜒壁間者往修覺寺道也曰姑舍是尋中徑數折上有亭翼然祠杜工部李供奉蘇端明方正學方有石刻詩可讀亭後數武爲寶華寺禮佛畢反自亭出山門左行竹樹純駁夾砌數折卽修覺寺寺前雙井一井直一塔唐物也明皇書嵌佛殿左側巖壁上字方廣三四尺一字各專一石飛翥沈着且甚完好予

入蜀所見唐碑獨此耳出寺無所見欲返寺僧指石隙一小徑才容足出此徑乃有平田大陸復緣磴數折上轟然瀕江者曰雪峰兩寺乃在其下始悟所云磴去頂四五之一者第可指修覺耳非此峰也左眺稠稷山如旅行而稍居其傍下憑欄視江則已正無所不見不若初所見江之從其下左方也然從下上修覺去江稍遠從修覺上雪峰視江乃反近舟中所指江干削壁者卽着脚處也降自雪峰復遶井塔下屈曲一二里許不復見所由寶華寺徑矣乃忽得所謂石級齒齒壁間往修覺

寺道者則今還道也與初所從徑合徑窮登輿是日抵彭山宿

茂州 在府西北五百五十里

領縣一

本冉駝氏之國按說文白馬黑面曰駝駝夷名也史記漢武帝元鼎六年南越破後冉駝等皆震恐請臣置吏乃以冉駝為汶山郡守是矣唐貞觀初始改茂州以茂濕山為名○華陽國志汶山郡有六夷羌胡羌虜白蘭蚰九種之戎牛馬旄氈斑斕青頓毳毼羊羖之屬特多雜藥名香土地剛鹵不宜五穀惟種菽麥而多冰寒盛夏凝凍不釋故夷

人多則避寒入蜀傭賃自食夏則避暑反落歲以為常蜀人謂之作五百石子也○禹貢岷山導江

註曰江水出蜀西南徼外東至岷山而禹導之郡縣志岷山在茂州西北最後番曰列鴛村村有岷山名曰鐵豹一曰羊膊則分水之上源也一自西南入大渡河一自正南入溢村經石紐過汶川水經曰岷山在蜀郡氏道縣大江所出東南過其縣北又曰江水自天彭關東逕汶關而歷氏道縣北註云岷山即瀆山也水曰瀆水矣又謂之汶阜天彭關亦謂之天谷也秦昭王以李冰為蜀守冰見

氏道縣有天彭山兩山相對其形如闕謂之天彭門亦曰天彭闕江水自此已上至微弱荀卿曰江出于岷山其始出山也其源可以濫觴焉益州記曰大江泉源始發羊膊嶺下緣崖散漫小大百數殆未濫觴東南下百餘里至白馬嶺又自白馬嶺廻行十餘里至龍涸又八十里至西陵縣又西北二十里至汶山故郡乃廣二百餘步又西南百八十里至濕坂江稍大矣口河圖括地象曰岷山之精上爲井絡帝以會昌神以建福古蜀謠云汶阜之山江出其腹帝以下會神以建福郭璞岷山贊

曰岷山之精上絡東井始出一勺終至淼溟作紀南夏天清地靜漢書注岷山一名鴻冢一名沃焦在隴山南首故稱隴蜀山直上六十里括地志云中國山川東北流其維首在隴蜀正義曰岷江發源隴山東北流入渤海水經注漢延平中岷山崩壅江水三日不流揚雄自岷山投賦江流以弔屈原名曰反騷也王羲之與周益州書云想足下鎮彼土未有動理要欲及卿在彼登汶領峩嶺而還實不朽之盛事又與謝安書云周益州書述蜀山川如岷山夏含霜雹校之所聞崑崙之伯仲也口

山海經云岷山神馬首龍身祠用雄雞瘞用黍則風雨可致焉郡國志岷山俗謂之鐵豹嶺陵陽李新詩在昔岷峨神龍文而馬首卽鐵豹之形也○華陽國志宣帝地節元年武都白馬羌反使駱武平定之因慰勞汶山吏及百姓詣武自訟謂歲再度更賦至重邊人貧苦無以供給求省郡郡建以來四十五年武以狀上遂省汶山郡復置都尉○唐茂州都督府壁記云貞觀初置羈縻州九曰維翼笮塗炎徹向冉穹維州今威州翼州今疊溪所笮以下則皆白狗羌矣其時一州所領不過數十里而已○寰宇記云梁普通初于此置繩州取桃關之路以繩爲橋也繩橋之法先立兩木于水中爲橋柱架梁于上以竹爲絙乃密布竹絙于梁一于兩岸或以大竹落盛石繫繩于上又以竹縷布于繩夾岸以木爲機繩緩則轉機收之智猛法師所謂冰崖皓然百千餘仞飛絙爲橋乘虛而過窺不見底仰不見天寒氣慘酷影戰魂慄是也又有度索尋橦之橋大江水峻極如箭兩山之脇繫索爲橋中剗木爲橦拴繫行人于上以手自緣索到彼岸則旁有人爲解其系尤極危險陸游詩度索

臨千仞梯山躡半空卽此○志云相公嶺亦名茂
濕嶺州之主山也州治有雪峰堂又有列岫堂鄭
微記畧云九頂列于南屏風臺盤列于西巨人橐
駝列于東又有練光亭王咨留題云汶江自徼外
東繞汶川郡西北出極目可百里許每朝陽舒彩
夜月流天之際一望水光若萬丈長虹夭矯其上
而吐吞之也舊有亭曰觀瀾據城之隅不與景會
因取少陵賦岷山沱江圖川蜺飲練光之句以練
光題其額云○碑目唐刺史黃堂梁記爲寶曆元
年刺史竇季餘大中三年刺史劉成師咸通三年
刺史蓋巨源題張延賞修城記載唐大曆十四年
吐蕃大下火焚郊館興元元年張延賞重修其後
別駕大夫修建城宇堡壁雉堞唐迴車院碑刺史
蓋巨源撰大中十三年立茂州治平寺碑寺舊在
外緣叛羌董阿丹焚毀元豐初移剏城中○勝覽
云巨人山在州南三十里山頭有石如人立面南
玄宗幸蜀時以石人背立勅令鞭之一百下有九
池俗傳是九龍湫其湫四山環遶百二十里○雞
宗山在州西四十里扼羌人出入之路熙寧間置
鎮羌寨按宋史熙寧九年靜州楊文緒導番董阿

丹作亂聲援俱絕至書木牌投于江以告急朝廷遣內使王中正將兵旁出雞宗山擊之文緒等伏誅碑目云政和丁酉倅貳跨鼇先生李新目擊靜州之變記載其事甚詳名更生碑今在更生閣○演繁露云蘇易簡言本朝使人至西番見有老人消縮如小兒伏梁上雞窠中乃其見在子孫九代祖也其說甚恠丙申十月十六夜寓直玉堂閱史見貞元間韋臯攻吐蕃其所攻州名有維保松及雞棲老翁城予欣然自笑曰易簡之說豈因此二城名而增飾之耶按寰宇記茂州西北至吐蕃棲

雞城下或卽此處

汶川縣

在州南五十里

漢之綿虎縣也釋名虎有角曰虎行水中以地有此獸矣晉置汶川州于此周保定間州廢乃設今縣○華陽國志漢嚴皇后爲汶江尉成都人仲昱少受學于季后及爲汶江以書呼昱昱許十月往會夷反斷道昱期必往經渡六十幾死數四卒得至汶江乃爲季后陳策俱得免難遠近欽之按漢武置汶山郡卽置縣曰汶江矣○水經註曰江水又逕汶江導汶出徼外岷山西玉輪坂下西南行

又東逕其縣而東注于大江水經又云江水歷氏道縣北有湔水入焉註曰水出綿道亦曰綿虜縣之玉壘山呂忱云一日半浣水也下注江○寰宇記云玉壘山在縣南三里又有玉輪坂其下汶水所經謂之玉輪江山出璧玉卽郭景純所謂玉壘作東別之標者○勝覽云七盤山去汶川縣九里志云卽玉壘關也賈島送玄巖上人歸西蜀詩玉壘山中寺幽深勝槩多藥成彭祖搗頂受七輪摩去臘催今夏流光等逝波會當依糞掃五嶽徧頭陀○慈母山在青城山東導江人馮大量與神仙

相遇入隱此山外史云滋茂龍池在汶之尤溪萬山叢立中有方池週四十里廣幾百畝清水鏡開芳草四積真靈境也登真書云滋茂池龍一曰慈姥在益州西南四百里有益靈藥可以已疾山無毒害猶慈姥焉故曰母田况益州龍祠記云蜀之西山有池曰滋茂亦曰慈母以其能興雲雨救旱暵楸養百穀而名唐開元中章仇兼瓊旣得平戎城夢一女子謂曰我此城之龍也今棄戎歸唐願有以居我章仇異之表爲立祠按通志慈母山在縣南百五十里昔有婦人引子采藥山中虎負其子

去母逐虎不得因長號而絕見者哀之曰慈母也其所載又不同矣碑目云滋茂池善應廟碑張商英無盡處士文其神或傳姓吳或傳姓郭頗有異同○龍洞在牛溪鎮入洞數步向南石壁有穴可通無路可陟掌洞道人附巨竹一枝于穴內令遊人攀竹而上可達龍池○文同茂州汶川縣勝因院記云繇玉壘南下過竿迤西循皂江左折越太平渡行深入曲無慮六十里至茂之汶川有地曰柘平羣山却立大陸初露畦麻嘈稻杳遠空濶披塢帶麓壤土鮮潤景物瓌麗人物純篤就其佳處

有院曰羅漢昔有頭陀德欽戒操甚嚴歲臘居久其徒委散是身獨在常懼其所將底墮落願擇高行屬以香火得未康軍大中祥符寺僧義海者付之至惟簡師凡五世也惟簡性顚潔所趣端慎守僧律作佛事癯形晦面不避風雨遠近四衆咸宗仰之既至此地乃圖崇飾伐木鑄崖大輯材礎構廣廈設尊像儲秘典納淨侶凡所欲有一一完具殆逾一紀功力方絕以名上列乃錫今號庭堂虛敞檐宇飄動丹明碧照續繡岩谷誠歸嚮之福地而莊嚴之道場也惟簡余之邑人遠來求紀其事

間嘗謂余曰青城諸峰惟大岷最爲高厚然丈人上青之望者乃世俗之所能見爾如吾所居正向其面脉絡表裏披斂出沒澗壑鈎蔓巒嶺曲折高林巨樾巍崗險頂晨霞夕靄染漬輝耀湍瀑淙激禽蟲啼響一日萬狀無有窮極鬼眼傾耳不知厭倦此方外清絕之境世間奇偉之觀而惟簡輒擅有之山林之人所獲多矣安得君之車馬一至其地以幸吾言之不誣余聽其說袞袞令人喜聞回視此身若處泥滓何時濯洗以從師傲兀于其間哉因命筆綴次其事使歸琢諸巖石遂以爲記云

熙寧二年十月十五日

威州

在府西四百里

領縣一

唐初置維州于薛城戍以有姜維城也宋平蜀後偶有京迤發維州誤至當州因改曰威取威制西羌之義亦維威音相近也按蜀志後主遣姜維馬中等討汶川叛羌其屯兵之處號爲姜維城唐武德七年白狗羌首領鄧賢佐內附于姜維故城置維州以統之至上元之後河西隴右州縣皆陷吐蕃贊普更欲圖蜀州累急攻維州不下乃以婦人嫁維州門者二十年中生二子及蕃兵攻城二子

內應城遂陷吐蕃得之號無憂城外史云古維州
在今保縣之外可八十里其對面乃無憂城三面
臨江巋然峰頂實諸夷之襟喉中國之要塞也李
文饒籌邊樓故址存焉今棄爲外徼矣按僞蜀永
平二年改維川郡爲保寧縣徙就中州城卽今治
也州治後卽玉壘山蜀後主觀湔江至此親書玉
壘山三字于州署其大盈丈左有龍洞焉湔水自
玉壘峽出而注爲泉有魚長可徑尺州人以爲神
魚無敢捕者○本志云州城原爲汶川縣址城內
之民半屬汶川城以外純屬汶矣碑目云鼓角樓

記唐維州軍事判官高測文乾符五年十月十五
日維州刺史李光置又云天寶寺碑唐咸通六年
建軍事判官陶師文伏波廟碑咸通八年左武衛
兵曹參軍崔遂文俱在維州○張舜民畫墁錄云
凡自岷州趨宕州泂水而行稍下行大山中入棧
路或百十步復出略崖崮崮不可乘騎必步至臨
江寨得白江至階州須七八日其所經皆使傳所
不可行攷之山水秀絕天下無有也臨江寨上望
一處當大山中西望雪山日晃如銀其高無際出
衆山上居人曰此雪山佛居也有獅子人常見之

四川名勝志卷之七
非西域雪山是蜀所記無憂城東北望隴山積雪如玉耳

保縣 在州西四十里

唐天寶間置天保郡于此乾元改保州孟蜀復改保寧縣 國初洪武十八年去寧字以避保寧府云○志云姜維築維州城遂築下邑其舊址在南溝之西李德裕築無憂城重築薛城戍舊址在縣東堊墳壩○縣四里編戶七姓耳今通化鹽溪已併入州所存者玉山箭上二里皆番也近亦叛去按通化縣本唐咸亨二年刺史董弁招慰生羌置

小封縣在西蕃通鶴軍垂拱二年城爲比番所沒今置在威戎軍西宋宣和加封西岳神勅詞云維彼通化地當西極金天氏之分域也卽隋之金川縣矣今屬州爲通化里○鹽溪縣隋之定廉縣與金川同置者唐貞觀初改爲鹽溪縣以村有鹽溪縣得採漉今演化禪師所居之地○玉山夜靜恒有霞光冉冉橫山前東北半壁天皆丹色照林木如畫至旦方滅俗名爲筆架山○箭上在縣東里許一岡斗直而下如矢曰箭嶺又云箭上卽唐之守捉城也亦不屬內地

四川名勝記卷之八

閩中曹學佺能始著

成都府八

金堂縣

在府城東七十里

唐咸亨初析雒及新都縣置宋以屬懷安軍元陞軍爲州縣屬如故後乃省州入縣○水經註云新都縣有金臺山水通於巴漢以水出金沙因以名山蜀記云金泉縣古有金船沈江東岸銳底民於水中往往見之○寰宇記云縣卽漢處士段翳宅也輿地碑目云段翳宅治內天慶觀是有段隱居

四川名勝志 卷之六
李真人二像碑字磨滅不可讀又云如舜禪師塔
銘在金堂龍槐院唐節度使杜悰撰文○宋之間
送楊六望赴金水詩借問梁山道嶽岑幾萬重遙
州刀作路絕壁劍爲峰惜別路窮此留歡意不從
憂來生白髮時晚愛青松勿以西南遠夷歌寢盛
容台階有高位寧復久臨邛○金淵志云懷安巖
爾國而有雲峰月峽之勝山之雄峙從梁劍而來
江水洪深自壩灌洛而至晁公武作雨零堂記云
堂依雲麓而中江縈之氣象葱鬱巖壑洲渚之美
映帶左右矣○中江在舊懷安軍西北源從漢州

彌牟洛水毗橋等三水會爲一江志云縣東十二
里曰前河卽彌牟水又三里曰後河卽雒水也幽
州刺史牂柯太守漢張子陽墓在沿江里許其碑
表載順帝永建四年造又放生記誓文唐太和二
年令狐紉撰亦在中江岸上○圖經懷安軍縣二
而鎮九以縣而言金堂爲大以鎮而言古城爲富
諺謂軍不如縣縣不如鎮舊縣在峽口距今治東
南四十里鎮距治北一里下爲古城河水絲灌子
灘入斜潭也○峽口相傳鼃冷所鑿謂之金灌口
東枕雲頂南披峽口水出山下如岷江之狀上有

李冰祠金川在其下流稍寬平處口金灌口之東有七織溪白沙清流文理如織又有柳溪在舊縣南七里常有柳葉從穴中出故名○華陽國志李冰導洛通山洛水或出瀑口經什邡郫別江會新都大渡按縣東南十里有大度鄉漢書新都王恉字少林署大度亭長初到日有馬與繡被馳至後爲郫令行至黎亭有鬼夜見稱其夫爲涪令之官過此全家見殺召遊徼按之悉伏辜而還其喪時人爲之謠曰信哉少林世爲遇飛被走馬與鬼語○縣北十五里昌利山有石室三門容數十人俗

呼爲三龍門碑目云唐昌利山有延祥觀碑開元中金堂尉沛國武捷撰○銅盤山在縣西北二十里北接雒縣南接新都山形如盤洛水彌牟水毗橋水經此山下合中江○名山志云金堂三學山乃漢州北山一名雲頂一名石城亦名棲賢開照其實一山也在縣東三十里李八百三度學仙於此故名其下隘口壁立千仞惟一路可通人騎謂之三學隘寰宇記云雲頂山舊名石城山其狀如城也頂上平可十畝有神泉方丈澄清如照雲霞常興唐天寶六載改爲雲頂山西幸略云唐明皇

至劍門山神見形迎駕稱姓李氏後陟武擔東臺
遠望祥雲紫氣盤結空界問左右曰此何處對曰
石城山乃悟山神扈衛之意遂改雲頂為慈雲焉
高僧傳唐開元中鑑源禪師於此山講華嚴感聖
燈現菩薩放光大松林後有寺額篆書三學字其
山四方面各三十里因謂之開照山矣勝覽云三
學山有佛迹石理堅潤瑩白如玉非世間槌琢所
能又有碧玉佛龕藕絲袈裟錦字心經貝葉金字
涅槃經寺前後檜栢皆隋唐故物又有飛石乃自
雲頂飛來先是寺有楠樹已枯石離而為二有王

頭陀語曰五百年後寺當廢若楠再生石再合然
後復興果如其言碑目云王頭陀塔銘在雲頂塔
院貞元十五年薛倕撰三學山飛石記邑宰張西
撰支提石塔記唐節度使段文昌撰鸚鵡舍利塔
記南康王韋臯撰□李義山為八戒和尚謝復三
學精舍表略云三學山夜有神燈朝明佛足風飄
雨濕且無金燼落時蘚剝苔侵尚有寶花承處五
代杜光庭功德記亦在山中□隋僧智炫遊三學
山詩秀嶺接重煙欽岑上半天絕巖低更舉危峰
斷復連側石傾斜澗迴流瀉曲泉野紅知草凍春

來鳥自傳樹錦無機織猿鳴詎假弦葉密風難度
枝疎影易穿抱裘依曠沼策杖戲荒田遊心清漢
表置想白雲邊榮名非我顧息意且蕭然唐王勃
遊梵宇三學寺杏閣披青磴瑠臺控紫岑葉齊山
路狹花積野壇深蘿幌棲禪影松門聽梵音遽忻
陪妙躅延賞滌煩襟薛能自廣漢遊三學山殘陽
終日望樓賢歸路攜家得訪禪世缺一來因薄命
雨留三宿是前緣詩題不忍離巖下展齒難忘在
水邊猿鳥可知僧可會此心常似有香煙題開照
寺云盡室徧相將中方與上方夜深楠樹遠春氣

栢林香聖跡留崑嶺險靈燈出混茫何因將慧劍割
愛事空王偽蜀太后徐氏漢州三學山看聖燈虔
禱遊靈境元妃夙志同寶香焚靜夜銀燭炫遼空
泉漱雲根月鐘敲樹杪風印金標聖迹飛石顯神
功偶望天涯極臨看日脚紅猿來齋室上僧集講
筵中頓覺超三界渾疑證六通願成修偃事社稷
保延洪太妃徐氏和云聖燈千萬炬旋向碧雲生
細雨瀝不暗好風吹更明磬敲金地響僧唱梵天
聲若說無心法此光如有情宋王雍題雲頂山詩
五色琉璃白晝寒當年佛脚印旃檀藕絲織出三

衣妙貝葉經傳一偈難夜看聖燈紅苗菡曉驚飛
石碧琅玕更聞鸚鵡因緣塔八十山僧試說看口
蜀志補罅云瑩碧池在石城山清修寺傍梁張僧
繇故居也僧繇每畫滌硯于池至今池水猶黑挹
之則清

簡州 在府城東一百五十里

蜀漢簡雍爲先主鎮牛鞞牛鞞漢縣也山曰賴簡
池曰簡池皆人民不忘雍政矣故簡之州縣設焉
○治前陽安驛本西魏之陽安縣也以陽安山名
治西南之平泉鎮本隋之平泉縣也以泉名俱詳

見下○華陽國志犍爲郡牛鞞縣受新都江去郡
三百里漢元鼎置有陽明鹽井卽牛鞞井也南齊
牛鞞戍設在州城西岸卽古簡縣址○三國志姜
維聞鍾會入犯表守陽安關右在州西南三里上
流井依山爲之舊陽安縣治水經注云晉羅尚乘
牛鞞水東征李雄發自陽安關卽此○九州要記
陽安縣南七十步有赤水如絳源出隆州今治西
二里絳溪是也溪上龍門洞有石如龍壁上龍門
二字州人許奕書傍刻柳子厚鈇鉞潭諸記乃宋
臨歐陽詢書○陽安有雁水源出廣漢曹榮謹詩

城下水流金雁月亭中人弄玉絃琴也雁赤二水之間有江月樓薛濤江月樓詩凭欄却憶騎鯨客把酒臨風手自招細雨聲中停去馬斜陽影裏亂鳴蜩○方輿勝覽云簡郡設廳棟宇盡唐制梁上題寶曆元年刺史張炎建抵嘉定之壬午巳二百九十有八年矣郡守壁記名氏始唐貞觀十三年見劉左史折柳亭記亭在朝天門外舊名情盡橋刺史雍陶詩云從來只說情難盡何事教名情盡橋自此改名爲折柳任教離恨一條條○西州道院在州治南宋紹興間建黎持記云陽安鄰於會府而有江山之勝處於高仰而有魚稻之饒民事獄訟比之旁郡十無一二凡隱於吏者樂趨焉人目之爲西州道院有望湖樓在道院之後湖光山色交相輝映輕舟小艇時時撐出柳陰中不謂重岡疊嶂乃有瀟湘茗雪之景也○志云簡縣忠清門外有唐太子誦書紀功碑甚巨元和二年朝議郎使持節簡州諸軍事李維勒石又有南康郡王紀功碑憲宗撰文太子誦書貞元十三年建原在龍興寺宋天聖五年移在州衙門外頌春亭側又云在郡市心居民室下紹興丁巳穴土見碑石太

守命工取之重撤民屋不果乃錄其文唐御製紀功碑銘并序皇太子書碑面殘缺不全惟碑陰開成元年臯從孫鋌爲本州守日紀述其文俱好遂覆之按此碑今已取出見存○州城外東隅有協濟廟土主梅使君漢南昌尉梅福之裔也爲郡太守生則遺愛萬民死則享祀百世唐玄宗幸蜀夢一老人墜於梅井五子扶而出之見頂生肉角詔問乃此神因錫爵土廟號遇水旱禱皆驗○簡池有四狀元張孝祥其一也出思陵親擢冠多士後徙居歷陽因號于湖有于湖集四十卷○州城內

雙市街之叢桂樓以紹興中朱熹同榜李皦如李進修范時中袁炎牟子正俱州人太守郭由中爲樓記○景德觀在州南一里山谷集云簡池覺範道人城東道友也住景德院其家風十二時似趙州東院西池種竹兩枝於宴坐軒中山谷老農作頌曰往在江南住竹山道人兩歲三來訪聽風聽雨看成龍牛羊折角入朝餉簡州城東刮地寒手種檀欒三兩竿竹成要作無孔笛若有靈龜一任鑽魯直又有題其也足軒詩不具錄○圖經簡有四岩東西南北也三溪東南前也三池柳鳳賴簡

也劉涇序云三溪號一郡之勝前溪在陽安治後亦稱後溪按涇字巨濟號前溪子光祖字德修號後溪其所著集亦以前溪後溪名焉文同後溪晚步詩云陰陰芳樹暗迴堤路入蒙籠轉野溪澤雉應媒高復下林鷗引子歇還啼青蒲宛宛全淹水紫竹斑斑半出泥倚杖風前感時節亂煙斜日一蟬嘶○南溪壽昌寺前水是也由南溪沿隄里許為東溪李良臣詩簡州何處景最佳東溪清絕人所誇即此溪上有碧波亭宋姚孳詩賴簡池臺兩蜀誇東溪別是一仙家令人却憶康王谷坐看珠

簾濺雨花按志劉文節墓及讀書樓俱在東溪上
有其父前溪自為圖序文節後溪公謚也今東林寺是其樓址一名東溪菴○柳池折柳橋下水也鳳池在治南三里水自城北一里鳳翅山來賴簡山接金堂山郡池名皆因之○東山在東江之外州治之左距城東五里岩高數丈刻東岩二大字有東巖院智通禪師卓菴處地居兩山之際溪流其中下有懸溜清音不絕旁有洞又有古柏大可二十圍為一郡之望剎志云即天王講寺也貞元初施頭陀剎口近巖有雙牙山兩石對峙如牙上

有井及石箱人見兩金鵝其側畫浴於井夜棲於箱○西巖在州之湧泉鎮有石刻大悲像光相屢現距治西五里巖洞深三丈五尺闊如之洞門刻西巖二字宋嘉定甲子王武卿結菴於此題名□近巖有石柱山孤高獨立上有石像百餘石室數間有仙人楊氏養丹爐鼎尚存登其巔可望逍遙山□勝覽云逍遙洞在玄都山去城三十里景德間有楊用晦者隱居此山上有層崖命工發之得東西二室西室後刻二竈若養丹之所又鑿二窟中可坐五七人東西二壁鑿二孔雀二神人有漢

安元年四月十八日會仙友十二字漢隸尚存按用晦簡池人能詩任心自適不求當世樂隱洞中時太原王載京兆金惟吉南陽鄧曦度杜審嗣劉旻遠來尋訪刻詩壁間○南巖在治南一里有洞深三丈闊二丈五尺方輿勝覽云南巖有光孝寺前敞飛閣盡覽江山之勝左有洞可容數十人卽淳風洞也石刻無名氏詩煙飛嵐翠撲衣裘落日牛羊下巉頭莫道山中午意薄江邊桃李自風流□簡州學記李淳風生於州之乾封鎮有故宅及墓按今銅鐘寺卽報恩光孝寺址宋孝宗隆興二

年陽安尉歐陽獬建疏請衡山和尚住持寺前高
敞有會勝亭趙抃知益州時寺僧有能琴者見知
於公作琴軒詩贈之云輟飲支筇會勝亭溪山佳
處古琴橫憑君傾耳殷勤聽一弄清風四座生諫
議大夫張方和云早向溪山得趣深建亭今復寄
餘音紛紛塵市無閒地獨有斯人物外尋○北巖
在治北二里洞深三丈闊五尺有坐榻茶竈傍開
石牕牕下有泉清冷不竭有寺舊名白馬院開元
中馬祖建倚壁有丈六金身無名氏詩云一帶江
煙半倚巖檻前時眺黑龍潭低昂竹影疎明月屈

曲松枝拂像龕樹老硬根穿石罅草生上葉入禪
菴西來白馬無踪跡寒鵲昏鴉暮景合碑目云院
有唐碑其歲月乃大曆時重修石壁刻云郡守潼
川王武卿攜家渡江過唐氏園偶泛舟泊山下登
劉氏江閣因上北巖禮大佛開禧改元二月十有
三日書□近巖有洞曰朝陽深三丈餘高丈有八
尺廣一丈內有石牀額篆石室二字蓋昔人煉丹
之所○右已上四巖乃附郭之勝其稍遠者有玉
華池天光觀覺林寺又遠則爲分棟長松諸山按
寰宇記陽安治北二十里玉女靈山東北有泉西

四庫全書 卷之八
北兩岸各有懸崖腹有石乳房一十七眼狀如人乳流下土人呼爲玉華池每三月上巳日有乞子者澆得石卽是男瓦卽是女自古有驗山爲仙人李八百修煉處○續仙傳云李八百居棲賢觀一名天光觀在城東二十里有唐碑可讀者云太和初三洞道士王道賜因張文舉施地基剏建按今爲明教寺○甕亭山在治南四十里石甕舖有覺林寺在大道傍王欽若題覺林寺詩暫拂塵襟思倍清竹風山色亂泉聲安民功淺君恩重又策羸蹄向古城趙抃前題古寺無碑刻僧云不記年自

余安所問惟是愛林泉○分棟山在州西七十里寰宇記云山北連秦隴南入資瀘東北入靜戎軍其巔有少休亭劉涇記云自成都趨陵簡如在簡必由靈泉過分棟山周數百里高大阻險以石次第爲步暑雨冬雪則馬不進僕亦以病告欲少休於是建亭名少休馬○稍北爲長松山州治之斧屐也界內諸山皆發脉於此長松寺本蠶叢廟址唐開元中馬祖行空和尚乃建寺明皇召對賜額長松衍慶寺又賜名香爲亭以貯之曰御香亭宋賜名嘉福寺今名靈峰□唐鄭谷集云谷自亂離

之後在西蜀半紀餘多寓止精舍與圓昉上人爲
淨侶昉公住長松山舊齋嘗約他日訪會勞生多
故游宦累年曩契未諧忽聞謝世愴吟四韻以弔
之詩曰每思聞靜話雨夜對禪牀未得重相見秋
燈照影堂孤雲終負約薄宦轉堪傷夢繞長松塔
遙焚一炷香○蟠龍山與長松相接唐大曆四年
郡大夫傅耆造大佛建院曰石門以山石分開似
之院門又有石形如夔刻字其上曰夔石口宋楊
甲遊長松寺宿石門僧舍詩疾風吹輕衣駕我雲
脊路人間一回首驚絕不敢顧鳥投虛無底渺渺

不知處蜂窠蟻丘垤與世同所驚試看一蒼莽誰
有不平慮尚憐野僧屋佛面荒苔蠹斷崖劃呀吻
洶洶崩石怒我來得奇觀拄杖叩巖樹青山有驕
色斯客不能句平生二三子慰我一相遇娟娟松
間月幽夕亦可度夜闌更小語風逼遺響去酌君
無多酒繼以木蘭露諸公緯石門院詩搖空柳色
金猶嫩傍道梨花雪未開只尺長松煙霧裏石門
頂上暫徘徊○志云去州治五十里山曰賴簡自
賴簡西亘潛度雁江而直走龍泉又曰隆泉在治
北八十里以澗水隆盛爲名今之龍泉驛是其處

□龍泉一名平泉又名靈泉隋初置平泉縣唐改
爲靈泉旋俱廢楊甲靈泉山中詩云小縣相籠合
濛濛數百家菓蔬爭晚市樵牧亂晴沙落日平林
迥青山去路賒偶居無事在隨意問桑麻又野色
山圍盡風煙更可憐客情牛鐸外農事藕花前聚
汲松根井寬愁石底泉雲安須斗水詩興亦超然
又勝地仙靈宅微官也謫居焚香他日夢隱几向
來書小睡便山雨長齋稱野蔬逢人問無恙滿意
說樵漁又日下叢林薄芊芊肅晚暉閉門成小隱
飲水亦生肥醉着溪藤杖歸來木葉衣狂歌有虎

兕吾道只應非又何處長松寺雨花雲外臺山從
百曲轉路入九關回老檜成龍盡殘柯借鶴來人
間斤斧亂風壑夜聲哀○成都文類益部十縣多
引江水溉田咸爲沃壤惟靈池疏決不到須候天
雨俗謂之雷鳴田縣東山下有朱真人洞洞北岡
嶺連屬逾二十里得褚聖母祠化跡尤異民咸事
之祈禱獲應潘洞詩云錦里城東邑高原十六鄉
江流分不到天雨降爲常節及三春後晴逾兩月
強龍乖尋穴蟄魚困入泥藏樹影全虧綠苗姿半
吐黃耕夫皆慘戚市戶亦倉忙潛慮寃無雪深疑

政有傷推恩慙睿主引咎謝虛皇磬折真人宇星
奔聖女堂先時蠲玉饌隔夜浴蘭湯洞口焚香遠
山椒作梵長幽誠期必達玄應果旋彰雷振南峯
下雲飛北嶺傍聲稠喧竹塢勢迫瀉銀潢飄灑連
三晝霧霓遍一方稻畦煙漠漠蓮沼水泱泱物態
涵優渥民情遂樂康洪施周庶品餘潤浹他疆稔
歲還堪待陰功詎可忘明靈何以報奮藻紀遺芳
□按朱真人祠卽今安靜觀楊甲宿安靜觀詩青
山轉龍脊矯首西南天上有仙人祠臺殿飛後前
下見雲雨興樹色暗平川仙人兩黃鵠一去無歸
年向來道上屨人着幾何錢一朝聞羽化悵望空
流涎却揮囊中金瓦礫來投捐巖巖化金碧香火
迤雲煙人間萬事爾旦暮有愚賢而况爭奪場轉
手分媿妍仙人一回首破隴與荒阡紛紛不足道
哀此區中緣石泉瀉幽潔意寂不肯喧夜聞松風
露起坐心寥然又云一濯巖下溪再拜巖中庭清
風肅然來吹我衣上腥仙人芙蓉冠乘月下雲輶
山空雜佩響靜夜朝百靈似聞客欲去小語猶丁
寧蕭蕭上松栢急以兩耳聽寂寥古壇外但掛斗
與星天明恐是夢恍惚遺心形去飲石上泉再讀

幽人銘青山無行迹霧雨松冥冥○古今集記云靈泉縣界有瑞應院唐永平中段文昌來攝縣尉手植四松於此院有石刻云乾坤毀則無以見寺寺不可毀四松其遠乎松至天福初止存其一縣令張松復補植三株有栽松記刻於石

仁壽縣

在府城東三百里

隋文帝仁壽間所置縣卽以年號爲名原屬陵州後州廢爲陵井監宋大觀四年改爲仙井 國朝併入當縣○今之貴平鎮入簡州界者乃後魏之貴平縣址又有廢籍縣城入雙流界者乃梁天監

之席郡也後改郡爲縣復訛席爲籍俱詳見下○寰宇記云陵州漢武陽之東境晉初西城戍也治南有陵井周武帝因以爲州名○圖經漢張道陵經茲地有山神稱十二玉女指陵上開鹽井監以陵名志地也文同奏疏謂因張陵以名井復因陵井以名州矣郡國志曰仙井陰氣襲人入者輒死投以火則煙氣上衝濺泥漂石沸吼如雷今玉女祠是其處○王象之碑目云張天師靈廟碑元和十五年知陵州李正卿撰文咸通十五年丘冲書云黃帝陰符碑在城內至道觀宋京記云此中江

山瑰奇自古王公貴人詞客才士未嘗一至故不得見於歌詠而爲浮屠老氏之學者往往擅而有之○方輿勝覽云艷陽洞在至道觀之後昔天師旣誓玉女於井因藏去其衣鎖之石室或謂之藏衣洞洞在重巖下岢岬幽窈晦明變化千態萬狀雖距闐闐不數武而若與世隔蓋道陵修煉之區也杜光庭錄異記云焰陽洞古老相傳在陵州陽山之上從來隱蔽人莫知其處乾德三年辛巳正月十六日癸卯井監使保義軍使太保馬全章夢一紫衣束帶魏冠者狀若道流揖之俱行至崖壁

所告曰此焰陽洞也閉塞多年能開發護持可以福利邦國又指其地近開小徑曰可斷之勿使常人踐踏言訖而去又且往尋其所果見土勢微陷以杖導之深不可測卽令本軍節級侯廣之勾當人夫斲地漸獲蹤由相次開掘見三重石門洞內並是細砂一無蟲蟻他物其洞自東入西深三丈九尺闊五尺三寸洞門三重第一重高六尺闊五尺二寸第二重高五尺五寸闊三尺七寸第三重從頂至底一向高六尺一寸三門相去各只三四尺鑄鑿精巧殆非人工三門內南畔別有石房闊

七尺四寸高四尺八寸深四尺二寸其後別有一小洞洞門有片石遮掩旁通一縫以燭照之深不知其底北畔亦有石房深四尺闊七尺三寸高五尺房內有石牀一西畔又有小石房深二尺闊三尺五寸高三尺一寸西北畔有石牀長三尺八寸闊二尺八寸有石竈模長二尺三寸額闊七寸竈深八寸周圍三尺五寸計從洞門向東一直至鹽井西相去可四十一丈八尺井在洞門正東也全章乃召當井監天師院主內大德費省真問之荅云天師院見有元和年刺史李正卿著天師聖德

碑云天師以東漢建安二年自沛遊蜀占犍爲分野見陽山氣象指謂弟子此山直下有鹹泉焉今驗此洞正當井上卽夢中所指者也洞顏隸書艷陽仙洞四字字體兼篆不知何代書旁有款識歲久磨滅東南貴人見此碑本寶而藏之以爲真漢隸志謂有東漢仙都四字在天師洞云○仙井監有蔡君謨法帖蘇東坡心經帖文與可書千字文陸務觀跋蔡帖云近歲蘇黃米芾書盛行前輩如李西臺宋宣獻蔡君謨蘇才翁兄弟書皆廢此兩軸君謨真行草隸皆備石在仙井可寶也淳熙元

四川名勝志 卷之八
年九月八日蜀州手裝○艷陽洞前有蓬萊閣秦
少游詩雄簷傑檻跨崢嶸席上風雲指顧生千里
勝形歸俎豆七州和氣入簫笙人遊晚岸朱樓遠
鳥度晴空碧嶂橫今夜請看東越分藩星應帶少
微明程公闢次韻半天鐘鼓宴崢嶸早晚晴陰景
旋生湖暖水香春載酒月寒雲迥夜聞笙金鰲破
海頭爭並玉雁排煙陣自橫我是蓬萊東道主倚
欄先占日初明按蓬萊閣在治東百許步又有含
暉閣近五十步趙閱道題含暉閣詩曉川嘉樹照
雙扉披豁幽軒景盡歸自喜吾懷已虛白三嵎山

色更清輝○輿地紀勝云平雲閣在郡圃文與可
詩陵陽郡事全稀少懶守長羸半日閑晚後須來
上高閣就中無厭是雲山與可在州送通判喻郎
中詩可笑山州爲刺史寂寥都不似州城若無書
籍兼圖畫便不教人白髮生又云近日簿書全簡
少吏人惟聽兩衙休歸來便只尋冠履遶遍林亭
山上頭○與可又有自然水石記云陵陽守居負
山悉石西左砌層崖餘地丈許平夷可屋因植四
楹面午橫楣闢幽軒正對大林高株缺間視遠峰
若畫工引淡墨作巒嶺疑疑時與煙雲相蔽虧愛

此有佳趣地復靜密公事少休卽至宴坐伏息日
計數取多乃去外俗不得知旁頽巨疆如瘤宜鑿
刻遂磨治將紀建置歲月沃水盪拭見黝理若髮
狀傾灘平波瀾漫骹迤復疊先後倫次窪淵聳浪
左右役目自非天寫神摹人巧孰能爲是必由融
結固已有堅包厚藏待予始發章物蓋顯晦信在
時人理疑亦然苟達此與知命何遠雖爾旣有形
必復壞倘後人加護則傳久未易泐也○州城東
西南三山相對而治居其中去陵井各一里謂之
三嵎山按古謠云三嵎青陵陽榮三嵎翠陵陽貴
郡守何者仲嘗於東山之下作青榮臺以表之張
紹祖山扉記曰有岡北來莫窮所自不亟不徐勢
趨東南欲薄城下岐而爲三行且五里虎踞盤礴
不復去此陵陽之所謂三山也○西嵎曰跨鼇卽
州衙坐山李石超覺寺記云州以跨鼇名者居三
嵎山之槩也去治半里有跨鼇亭每歲上元重九
太守率僚屬燕其上有石姥在山頂歲旱里人轉
徙之天卽黠鬣雨四注文同賦曰上簪岑之飛泉
今披蒼蔚之榛莽爰有石之跂跂兮旁無他而相
伍其遠睨之若人兮迫猶疑其蹲虎里俗神而甚

恭今號相尊而曰姥

云

○南嶠曰翳嘶頂上有

翳嘶廟相傳神卽巴郡太守嚴顏也宋何臬作碑
記併書山前有霄漢堂紹定中隆州軍事推官文
大虛爲碑記俱存山之麓有更生寺宋丞相虞允
文爲其父秦國公建碑云紹興十八年六月二十
六日鄉人鮮于述旣死復甦言地府有更生佛故
秦國虞公祺也明日以告丞相正秦國小祥之期
丞相因言秦國屬纊時微疾耳忽睨坐客古佛俱
來吾當歸允文泣下公顧曰身得爲佛有何不可
含笑而逝按寺在縣東南數百步秦國又有功德

院在城西玉屏山□元虞集仁壽寺僧報更生佛
祠前生瑞竹詩聞道故園生瑞竹令人歸興滿江
干扁舟不畏瞿塘險匹馬誰云蜀道難杜甫溪頭
花叵匝孔明廟裡栢闌珊新堂題作歸歟字定得
臨江把釣竿伯生丞相裔孫也有還鄉詩云還鄉
思速去鄉遲王事相縻敢後期里父留看題壁字
山僧打送捨田碑胡桃筇竹南方要盧橘枇杷上
國知此日君親俱在望徘徊三顧欲何之○東嶠
曰飛泉上有超覺寺按圖經隋仁壽元年獠反百
姓城於山頂避難遂有飛泉湧出獠平泉涸因呼

爲飛泉山文與可詩東城兀高峰爽氣浮翠微霞
光射巖壁中有寒泉飛碑曰云飛泉院碑唐神龍
元年立超覺寺碑廣明二年陵州刺史蕭銑記志
云超覺寺有爾朱仙影刻二片一全影一半影也
有乾道中虞丞相書碑勝覽云飛泉山下蟠溪丞
相何公臬所居何公始生六日瑞雲山當夜半紅
霧亘天此山東去蓋四十里○碑目云佛龕山有
唐貞觀中率更令歐陽詢書金剛經磨崖碑按卽
佛厓山也在縣東二十五里山有三石像背虛面
巖俗呼倒坐寺○城東北石城山平等寺有天寶

四載薛兼金撰道超和尚精德碑謂石壁如城絕
頂望見峩眉云○城南一里鼎鼻山隆然特起又
曰隆山隋大業改陵州爲隆山郡本此郡國志云
周之九鼎淪一於此往往見鼎耳因名○城南二
十里有麗甘山山下鹽井是十二玉女故迹以玉
女美麗井水味甘合而爲名也又云古鹽井號聶
甘井井傍有神祠號曰聶社○又二十里有儒社
山虞允文書碑云紹興癸酉十月八日允文來遊
知先世種德本末感愴久之石刻今存佛子寺○
城西朝女山昔有女子居山悟道肘脛之蹟印石

上猶存○碑目云後唐同光三年靈泉院碑在本院山上按卽譚子池也亦名天池宋進士郭周藩詩云靈泉在山頭酌之不足卮試詢陵陽叟何云譚子池一叟爲我言郡有譚叔皮在唐開元末生兒名阿宜墜地解言笑九歲森髯髭不食且不飲超然忘渴饑十五銳行走夤若神駒馳二十入山林人莫知所之父母念不泯鄉人爲立祠大曆元年春此兒忽來歸頭簪鳳凰冠身着霓裳衣再拜向父母一吐心中詞兒乃仙子流塵市不可羈鄉人意雖厚立祠將焉爲妖魅一朝據作祟無休期

急爲告鄉人毀之勿遲遲祠下多金藏不知使何時盡取濟不給幸勿藏於私言訖卽辭去仙袂風披披於焉撤祠宇突兀成平夷果獲千黃金貧匱得所資金盡泉繼湧湛若青琉璃不滿亦不涸旱澇恒若斯禱之立有應翁如墳協麓由來羽化人出處同鬱儀去今數百載跡在名還垂□天池山麓有顯忠院宋尚書僕射何臬藏主處臬從徽欽北狩死沙漠華表柱猶存又有寶籙院宋寶謨待制陳咸葬所號寶謨阡蓋宋故事名位顯者得於墳側建刹度僧以薦先福焉○志云陵州梵宇多

以龍名若龍興龍居龍泉龍厓是也龍厓者鑄石
爲龍卧厓下卽文與可鑄怪石墨竹處跨鼇山人
李新題云淺梢疏節似瀟湘正向祁寒敵曉霜清
興未窮僧已老自餘山色與溪長雅安僉判程壬
孫詩風雨勞先別敢辭尊酒深一梢牆上竹留作
歲寒心右俱在寺壁上□按龍興卽報恩寺也寺
有大悲堂及大悲閣王象之碑目云龍興寺大藏
經碑開成五年吳商撰古大悲堂碑乾符三年周
宋莒撰篆字心經碑咸通七年仇溥撰并書修大
悲堂碑景福二年僧承徽記僧曉微碑在寶林院

西蜀明德元年立又有顯教大師碑廣政四年立
鐵騎將軍碑孟蜀廣政二年立○寰宇記云貴平
縣漢廣都之東南境後魏時與平井縣同置舊治
和仁城開元十四年移治祿川按圖經祿川距貴
平縣三十步發源簡州下注資江而東水多魚蝦
縣人利之過祿川有蘭溪唐隱士張鴻居其上按
益州記平井縣兩竈二十八鎮日收鹽四石如霜
雪是也○碑目云貴平縣文宣王廟碑長慶五年
陵州刺史李正卿撰尹泰階書碑在縣址後百步
可揭而聖賢石像委榛莽中近方瘞之碑後巖下

○唱車廟在貴平縣南九里漢朱辰爲巴郡守有恩於巴吏人送辰到蜀回至此爲辰立廟以其山近鹹井聞推車唱歌之聲爲名今鹽井推轆轤皆唱爲號令馬碑目唱車山開國王碑貞元元年貴平令王覺撰牟尚書墓記同光五年領州事陳貴民撰○貴平西北四十里寶峰院有唐人撰寶峰院記院內有王羲之記王氏廬墓銘按志邑王氏女至孝親沒廬於墓側三年有司立碑表之王羲之爲作廬墓銘剝蝕殆盡○廢籍縣城在今治北一百里今爲鎮有籍田公館接華陽界縣南平地畝餘踏之軟動右泉淵灑旱不涸潦不溢名曰息壤魚蛇水在其北導江水在其南丹砂山在其西○漢黃龍甘露之碑在籍縣江口上銳下方其狀如鐘大書漢黃龍甘露之碑七字餘不可讀其可識者羣臣將軍位號蓋爲龍紀也

井研縣

在府東一百五十里

寰宇記云縣本漢武陽地有彭山彭首獠姓在始建鎮之東按卽隋之始建縣也後魏置蒲亭縣于此今縣東一里有黃丞相池池中生蒲起亭以存古意焉○周地圖云蒲亭縣有鐵山諸葛亮取爲

刀劍宇文度封鐵山侯卽此志謂鐵山一名茆香山在縣東六十里舊始建縣東○井鑊山在縣北其山俯臨井鑊因以爲名僖宗幸蜀井鑊山神見卽此山也方言關東人呼鑊爲鹵研故今縣名取此○碑目云唐節度使楊公墓碑在隆州井研縣道傍有石刻云唐銀青光祿大夫簡校御史中丞上柱國節度使楊公墓旁多楊姓乃其子孫又有宋何臬撰陳德用墓碑銘在縣南四十里木龍鄉宣和六年立又有青陽仲廣塔記在縣之天王寺其略云寺有塔以藏舍利爲層十三此釋迦氏殊勝莊嚴僧祖逢創始於隆興壬午基就而力不繼邑人憫焉願續其事邑之利源以鹽自層一至九費所取者三之一施心殊未厭又合力爲第十層工徒輓瓦之供自十而上合尖有期矣嗚呼事有一人營之百人終之者不營於始無以開其先不續於終無以卒其功百人者一人之繼是塔之興雖多歷年所然終於有成者百人之助也掌化任剛乞文刻石置層上以紀歲月云

資陽縣

在府城北一百二十里

華陽國志資中縣受牛鞞水今縣本漢資中縣也

後周武成於資中故城置資陽縣以資水爲名○志云城西二里資谿縈紆九曲合流雁江近掘得宋張方題資谿橋詩有資水右旋江會合之句王巖資陽江詩淡雲殘雪簇江干策蹇遲徊客興闌持鉢老僧來咒水倚船商女得搬灘沙翹白鷺誰真淨竹映繁梅柰苦寒阮籍莫嗟岐路異舊山溪畔有漁竿范祖禹月夜船行入資川詩憶昨卧碧山蒼蒼叢桂間白雲爲屏石爲枕綠蘿長掛明月闌忽乘輕舟泛江水山月隨人還在此白鷺驚飛宿靄間青山倒臥蒼波底此時孤棹發中流川後

停波聽棹謳不學子猷中夜返欲乘明月向資州

○漢王褒故宅卽今縣理解中八卦井三字子淵

筆也輿地碑目云西漢王褒宅在資陽縣西駟馬

里今改爲靈仙觀有觀碑二說微有不同舊圖經

云資陽南五里書臺上豐碑二十餘片刻聖主賢

臣頌山是王子淵讀書處有洗硯池○縣之延壽

寺漢董鈞故宅志以爲宋張方宅非也按亨泉墓

在縣北二十里有石獸存其宅未詳○資山在縣

西南三里迥然秀拔卽寰宇記之獨秀山也范祖

禹資山詩云醮壇巖谷多神仙鸞車鳳輦隨飛煙

神女瀟瀟來暮雨浮丘往往下雲輶○碑目資陽有三仙磨厓石在三江鎮刻云貞元十四年十月十日杜錫崔熊席夔三人同遊○郡國志資陽有陂溪百丈池所謂溪流如陂池深百尺也志云學宮前有星月池有井傍池如星又東一里有放生池及碑碣顏真卿書又南二十里有孔子溪石壁上鐫孔子字云其地昔有鄉校祀夫子刻記猶存

資縣

在府城東二百里

陳留風俗傳及姓纂俱云資姓黃帝後在益州資中今邑之山川皆曰資從賜姓也縣有珠江馬驛

銀山鎮巡簡司盤石龍水二鄉解俱詳下○宋資縣令盧法初建惠遠堂摹禮殿人物圖繪堂中以訓諸士○縣治南街有炳靈孚應祠李石知幾爲之記畧云初蕭君玉建廟成屬某記之偶有以石未官爲嫌者君玉具壽書有官者及其名質于神三禱皆得石名乃不獲辭今碑見在○禮記萇弘氏孔子嘗問樂馬死之二三年而血化爲碧按圖經萇弘資中人有祠在青泥坊數里之內土色尚青又漢王子淵墓在縣東二十里墓前石碣高丈餘碑目云王褒墓右有河相弘農碑未詳人代○唐

元和中羊士諤爲資州守其詩云洛陽歸客滯巴東處處山櫻雪滿叢峴首當時爲風景豈將官舍作池籠登郡前山作也一雨東風晚山鷺獨報春淹留巫峽夢惆悵洛陽人柳意籠丹檻梅魂覆錦茵年華行可惜瑤瑟莫生塵郡中早春作也腰章非達士閉閣是潛夫匣劍寧求試籠禽但自拘江清牛渚鎮酒熟步兵廚唯此前賢意風流似不孤郡中詠懷作也又郡齋讀經作云壯齡非濟物柔翰誤爲儒及此齋心暇翛然與道俱散材誠獨善正覺豈無徒半偈蓮生水幽香桂滿爐息陰慙蔽芾講義得醍醐跡似桃源客身嬰竹使符華夷參吏事巴漢混州圖偃草懷君子移風念嗇夫翳桑俄有績宿麥復盈租圓寂期超詣凋殘幸已蘇解空囊不知滅景谷何愚幾日遵歸轍東菑殆欲蕪竇叔向雨後月下寄懷羊二十七資州云夕霽涼颯至翛然心賞諧清光松上月虛白郡中齋置酒平生不開襟願見乖殷勤寄雙鯉夢想入君懷○碑目云羊士諤在郡有毗沙門天王贊碑歲久陷於城北隅紹興中邵博爲守始掘得之又云青松亭記大唐乾符四年西川節度使成都尹高駢文

并書瀛洲亭記繪唐十八學士鮮于侁文并書俱在郡圃聚書樓記李石文博雅堂記張震文俱乾道七年立碑其聚書樓記略曰國家渡江以來值五厄之會收四部之富頒詔首降三館所儲兩學所集分錫郡國州有書樓侈其賜也自宣和辛丑前太守魏侯潤博以州號多士請於朝減他州之賜以益此州宛乎如韓宣子所見周書之在魯矣歲久鼠穿魚蠹且爲有力者負去今守宇文侯爲州起發手書之家傳人市殘缺散逸者咸綴錄焉比舊目增千餘卷因舊樓徙故葺新復爲廚肆貯之○博雅堂記略曰宇文紹奕爲資守風清事簡則歎曰自吾承先大父右丞相公餘烈以詩書發身凡二十年間聚書上自孔氏下至歷代諸史稗官小說與夫國典名公之文合萬餘卷手所校錄者幾半之不爲不多矣顧猶有遺恨者嘗見前漢文字之奧篆隸之工鏤金石而傳後世尚有可攷乃其在中原者淪於夷狄後生不可復見吾家故所貯吾幸得之不欲擅而有也盍傳之是邦以與學士大夫共之於是摹刻漢石經及他碑凡五十四卷覆以石柱大厦名其堂曰博雅登斯堂者如

入太廟見尊罍彝鼎簠簋孟豆之陳聞成韶濩武
雲和笙篪之音列天球河圖寶玉大方之器饗太
羹玄酒昌歆醑粢之味莫不咨嗟嘆息以為君侯
好古博雅之士矣○方輿勝覽云企仙閣在治北
憑高視下得一郡之要李石為記以李傅侯張各
據一山合四山而拱揖之故曰企仙亦曰蓬萊○
治北二里醮坎山李阿修煉處肖像猶存杜光庭
有醮坎山北帝院記以為張道陵居焉山畔有洞
鑿石七十二級遠望之如入雲中范祖禹詩醮壇
高倚碧天開中有清都白玉臺霧擁雲旌乘月去

風吹仙樂下天來○縣西三里平岡山傅仙宗所
宅也崔中吉崔達亦嘗居此○玉清山高二百丈
俯瞰平湖在州南二里侯真人遺迹存焉得道山
在州西十五里張開光於此得道也碑目陳圖南
得道山詩鑄於石壁邵傳跋○宋京蜀事補亡云
東蜀領郡十六而江山瑰琦資中為最資中勝遊
十數而四巖為最謂縣有東西南北四巖也按圖
經距縣城東三里曰東巖形若剖菴側立千尺溪
壑深杳石壁上刻中興頌顏魯公書縱廣盈丈去
磨崖五里有唐明渡以明皇所經矣巖上鑄宋承

議郎鄭鋼詩云逕轉得幽谷雲巖屹相向谿谷偃
重簷灣環依疊嶂緬想融結初鑄鑱自天匠了無
斧鑿跡但覺盤根壯深可數千尺廣逾八九丈洞
穴既窈窕松門亦昭曠廓舍三千界中列五百像
巨楠布幢蓋翠蔓垂帷帳木靈不知名境幽或難
狀我時馳征軺犇走劫塵鞅獲此一段奇欣然愜
微尚欲去興未闌行行重回望末云宣和壬寅題
又鐫云丞相大觀文沂國趙公以東川鎮鉞晝繡
來歸弭節鄉郡為父老大夫士七日留乃歸內江
之府第郡守楊禔執門生禮敬餞於東巖一時賓

客直秘閣新利路運副韓炳新巴州趙伯總新恭
州趙善詔新大寧監黃中前昌州黃圖南新富順
監黃裳制幙勾龍復成與俱語出林杪慷慨與坐
客盡醉公抗大節於天下而略位貌於鄉黨於是
氣凌八極矣禔請磨翠壁紀盛事共託公為不朽
咸曰然淳熙壬寅二月十七日題○方輿勝覽城
西六里為西巖山行不踰百步石壁夾道如城如
峽○城南五里為南巖按即重龍山也嵩翠盤屈
隱若龍轉有亭閣梵刹跨其上江山城市歷歷可
觀○北巖去郡城半里等慈寺之東唐盧弁詩地

靈無俗草巖靜有仙禽卽此崖巔古像半蝕苔蘚
乳泉滴瀝四時不絕蜀志補遺唐李渭爲刺史有
遊山詩云淮陽清淨理永嘉山水心刻於等慈寺
壁碑目云邵泰修北巖寺碑洗公石馬塔院碑滴
水巖結界碑俱在本寺又云盧弁及張公瑾北巖
詩俱刻在龍水縣○寰宇記云龍水縣本資中地
隋置在龍龜溪資陽西界依龜山隴爲城今縣北
三十里之龍水鄉是也溪水屈曲蟠擁猶龍亦曰
龍潭石壁有古刻云積雨新霽灑爽澄空寓異探
幽人生行樂殊不易得縣令任聖用挈鄉人蒲君

勉楊述美洎邑士張和叔飲於龍吟亭風味相投
山樹巖石咸助意氣且移罇潭上醉歡歌笑見月
迺歸乾道辛卯仲秋丁未述美書○范祖禹知龍
水縣公餘紀興詩云縣門倚巖谷終日對青峰初
仕借爲宰讀書過三冬忘機狎鷗鳥觀稼親老農
訟庭可羅雀銅印苔蘚封○續古今記龍水縣有
昭烈皇帝碑形如方柱頂如蓬壺文剝落三之一
紹興丙寅孫原濟榻○碑目云龍川邑小而江水
環秀距邑不二里曰靈巖又其傑出者端平乙未
夏五月十有八日東川撫屬古渝李粹甫來酬供

於此邑令眉山山孫子山警曹巫山馮亨叔相與訪古靈湫載酒酌其上午暑方劇樹林陰翳巖巖氣襲人恍若此身在冰壺絕不知人間炎熱之苦竟日徜徉興殊未盡而景已晡矣遂拂翠崖而書以紀歲月云前蜀馮銖靈巖秋月詩青松崖上紫雲生崖下仙人約舊盟駐馬看碑驚化鶴暮雲回首萬家城銖仕前蜀武成爲盤石令○寰宇記云盤石在城北二里狀若盤陀後周以之名縣遂寧傳者盤石遷治記云珠江流其前丹神隱其北醜據其左靈巖蟠其右劉光祖記云資號珠江

靈而產瓊異相傳江中有夜光如燭故名又有丹神山在盤石西北五里山神極靈旱告之卽雨寰宇記之丹山縣因此名也○按魏書保定二年資州盤石人反殺郡守據險自守州軍不能制總管陸騰率軍討擊破斬之而蠻子復反所在蠡起山路險阻難得掩襲遂量山川形勢隨便開道蠻獠畏威承風請服所開之路多得古銘竝是諸葛亮桓溫舊道是年鐵山獠抄斷內江路使驛不通騰又進軍討之一日下其三城招納降附者三萬戶今資陽之丹山鎮入其故縣界○圖經廢銀山縣

在治東四十里山形如錠今銀山鎮是其處古今集記云唐田游巖入蜀居於銀山聚弟子歌雅詩以爲樂今山有雅歌臺石刻存志云銀山候館因掘地得一小碣石乃黃山谷與門生戴經弟綱尺牘云七二郎氣秀而有骨他日學問仕宦皆當過人要須得一佳士與遊養其忠厚之源此最爲先務涪翁書贈戴六六七二秀才伯仲口鎮北之杜家溝池水一泓清冷澄澈下卽龍泉洞也天將雨則雲生竅穴霧瀰空谷前有石柱殿相傳龍出毀殿止存二柱崖上鐫二龍土人懼其飛動摧去兩

角山谷曾遊此碑目云龍泉洞壁刻有淳熙丁未三月九日何少虛少明從成都張无咎來汲深晤坐因訪舊題數丁亥仲春六日字書與當時人物磨去已六七廿年間幾風雨矣少虛且老日有倦遊之歎方爲涪翁釣磯之行益起丘壑之念故山猿鶴其能忘情哉又有王齊賢李若水王簡熊九能濯凡塵步武而去等字○寫韻樓云資州古碑有祝融氏祝誦氏之號學齋帖碑云資州掘地得漢碑有伏羲倉頡初造工業畫卦結繩以理海內等語碑目云隋勅改羅漢院碑在法雲院唐開元

四川各縣志卷之八
樓神山略記在法鉢池前刺史房渙文崇壽觀碑
天寶二年建玄宗書額御史中丞宋渾文已磨滅
裴晉公自贊在靈虛院左僕射裴瞻墓在盤石縣
北五里有世譜碑記藏於寶靈院馬端臨通考云
資州以新絳帖十卷刻石予家多有之前有目錄
元刻麻石上續搨者不逮舊所得本道勁已上皆
不可攷

內江縣

在府城東四百三十里

華陽國志江陽郡漢安縣郡東五百里土地雖迫
山水特美好宜蠶桑有鹽井魚池以百數家家給
馬一郡豐沃○水經注云雒水又逕漢安縣謂之
綿水口又寰宇記云周天和中於資中地置漢安
戍在水濱尋改爲中江縣隋開皇避先諱改爲內
江仍徙治於漢安故城卽今縣也勝覽云中江水
經盤石縣自十字水流入縣界又云內江有水深
百丈實羣川總會之所晉郭璞城讖云山行依舊
合水去復還來○按志中江源出汶山自灌口分
支經懷口入簡縣歷資江而下爲中江經三堆出
下西折而東至縣復東折而南至柁木鎮又南折
而西至黃市市距三堆十五里一水周環九十餘

里而縣當其中故曰中江江去城不百武與城內
桂湖相通以盈縮清濁知之也湖在西北街宋黃
思莊大書二字于岸石上旁植桂樹影可婆娑云
○碑目云漢永建五年陳君爲漢安長失其名有
陳君德政碑在獠井壩層崖之腹字雖磨滅然尚
可攷又有漢永建五年漢安修棧道記俱在內江
縣○本志云宋紹興末於內江縣置安夷軍董昌
齡時爲令移徙新市平縣基得小碣一片刻詩云
戰馬向風嘶荒雞隔水啼終日隨征旆何時罷鼓
鼙按今之安仁驛沿其名○治東半里東林寺有

石佛按卽東津寺也范祖禹資州路東津寺詩山
行無晨暮日暝崖谷昏哀猿落客淚永路驚旅魂
憑陵高山巔俯視大江奔迴環島嶼合縈轉洲渚
屯行雲赴炎天飛鳥下蜀門地遐怪物聚寺古深
殿存憶昔李氏末煙塵暗中原姦雄競草竊割據
窮海根干戈百年後見此敗屋垣我來屬清秋登
覽無俗喧山深虎豹歸水靜蛟鼉騫臨風獨笑叱
浩蕩欲飛翻自註云寺有石佛殿唐乾寧元年建
○城南銀杏舖江邊有放生碑款爲宋都護校尉
周仲亨立有寶光洞壁上鐫雲塞浴溪口金波光

明久十字紹興進士邑人闍執中書又渡江對岸
爲葛仙山相傳吳郡葛孝先曾棲其上今有巨人
跡編戶葛仙里之名本此○治南二十里高峰山
瀕江有洞曰會真中刻大士羅漢甚古唐大姓閻
氏所闢者洞室幽邃時或撫掌聲若鳴蟬有斷石
碣○城西二里化龍山麓舊縣址也有長生觀凌
風龕及冷然洞咸淳中郢有朱真人者棲其中修
煉得吐納之術其冷然洞記略曰予落迹安夷有
長生池丹臺冷然洞青眼不逢揭籃而去因有容
迹安夷尋達者無緣寄語共乘風之句咸淳癸酉

九月五日記又留題化龍山云郭外郊西柳已黃
東流注目浩無涯江明白白紅紅樹春在三三兩
兩家幾度來臨逢社燕一樽相對到昏鴉此邦物
色吟成畫高謝山中景致嘉刊碑在長生觀中正
嘉之間山崩得古鏡及劍印石刻識云有宋之始
化龍爲記日月相均永遠不墜亦疑朱仙所留○
又五里爲聖水寺寺有靈湫古碑紹興庚申水觀
禪師所剏邑尉蔡逸詩云二月春事半縣花無數
開江頭連騎行江霧結紅埃下馬坐清蔭觀漁大
江隈行行歷山寺金碧森樓臺拂石有唐碑字老

生莓苔緬想古今事悠然一傷懷解榼醉泉石徬
徨不忍迴辭徑下扁舟重開賸樽罍江煙暝川谷
水輪出崔嵬水面映金波流光浮玉杯蕩漾洲渚
間往來恣徘徊一棹轉圓沙燈火來相催高歌賦
厭厭會須期再來○城西二十里之三堆山尖峰
插漢桀閣憑空有古石像土人多遊焉昔耕者於
山掘得小銅版上鐫詩云塵世不我留身寄白雲
浮若問真遊處三山與十洲不知爲何代物○縣
西北十五里華萼山有寺臨江厓上鐫滙瀾有斐
四字唐范崇凱書崇凱玄宗時獻花萼樓賦爲天

下第一鄉人榮之以貶名其山也其弟元凱亦能
文時稱爲梧岡雙鳳李太白贈范金卿詩云君子
枉清盼不知東走迷離家未幾月絡緯鳴中閨桃
李若不言攀花願成蹊那能吐芳惠好鳥相招攜
我有結綠珍火藏濁水泥時人棄此物乃與燕珉
齊拂拭欲贈之申眉路無梯遼東慚白豕楚客羞
山雞徒有獻芹心終流泣玉啼祗應自索莫久留
舌示山妻按金卿崇凱字也所居故址有卧碑鎮
華萼樓賦剝蝕殆盡山之後灣有金卿墓○志又
載趙逵宅墓俱在梯雲山宋史逵字莊叔內江縣

人讀書數行俱好聚古書紹興辛未對策第一他日高宗謂曰秦檜日薦士未嘗一語及卿以此知卿不附權貴真天子門生也達著有梯雲集三十卷○志云石筍山在治東南七十里有石如筍者三下圓上銳聳峙漢表清影沉江則長虹滿地新月初上則明燭當天形家謂爲邑之地軸以三堆爲天關云○按今中江縣之水本內水蜀志先主從內水入涪是也而內江縣之水本中水以在內外水之中也沈約宋書云資江爲中水涪江爲內水恐因縣名而反混水名故特表出之

卷之八
終

卷之二